

## **Convenio entre a Consellería do Mar da Xunta de Galicia e a Agencia Estatal Consejo Superior de Investigaciones Científicas, M.P. (CSIC), a través do Instituto de Investigaciones Marinas (IIM), para a realización do proxecto “Avaliación do estado das poboacións de zamburiña (*Mimachlamys varia*) na ría de Ferrol: un enfoque integral para a súa conservación e xestión sostible (ZAMFER)”**

En Santiago de Compostela e Madrid, a 24 de marzo de 2026

### **INTERVEÑEN**

Dunha parte, Dna. Marta Villaverde Acuña, Conselleira do Mar, nomeada polo Decreto 35/2025, do 4 de xuño (DOG n.º 106 do 5 de xuño de 2025), actuando en nome e representación da Consellería do Mar da Xunta de Galicia, en virtude das facultades recoñecidas polo artigo 34 da Lei 1/1983, do 22 de febreiro, de normas reguladoras da Xunta e da súa presidencia.

E doutra, D. Carlos Closa Montero, na súa condición de Vicepresidente de Organización e Relacións Institucionais da Agencia Estatal Consejo Superior de Investigaciones Científicas, M.P. (CSIC), nomeado por Acordo do Consejo Rector do CSIC, na súa reunión do 30 de novembro de 2022 (BOE 23/12/2022. Res. Presidencia CSIC do 14 de decembro de 2022, pola que se resolve convocatoria de libre designación), actuando en nome e representación desta institución en virtude das competencias que ten delegadas por resolución do 5 de decembro de 2023 da Presidencia do CSIC (BOE do 18 de decembro de 2023).

Ambas as partes declaran atoparse debidamente facultadas e coa capacidade necesaria para obrigarse nos termos do presente convenio, a cuxo efecto

### **EXPOÑEN**

#### **Primeiro**

Que o Regulamento (UE) 2021/1139 do Parlamento Europeo e do Consello, do 7 de xullo de 2021, polo que se establece o Fondo Europeo Marítimo, de Pesca e de Acuicultura (FEMPA), e polo que se modifica o Regulamento (UE) 2017/1004, establece no seu artigo 3 as prioridades da Unión Europea para contribuír á aplicación da política pesqueira común e á política marítima da Unión; doutra banda, tamén sinala que o FEMPA contribuír á consecución dos obxectivos medioambientais e de mitigación do cambio climático e de adaptación a este da Unión. Neste sentido, no ámbito da pesca e do medio mariño, o FEMPA establece o seguinte obxectivo para o período 2021-2027: “manter a pesca como actividade produtora sostible mediante a xestión sostible e a conservación dos ecosistemas mariños”. Doutra banda, a prioridade 1 do artigo 3 do citado Regulamento 2021/1139 fai mención a

“fomentar a pesca sostible e a recuperación e conservación dos recursos biolóxicos acuáticos”, desenvolvendo obxectivos específicos entre os que se atopan: reforzar as actividades pesqueiras que sexan económica, social e medioambientalmente sostibles, obter datos fiables que permitan tomar decisións baseadas no coñecemento e contribuír á protección e á recuperación da biodiversidade e os ecosistemas acuáticos.

Por Orde do 27 de xuño de 2022 créase a Rede entre o sector pesqueiro e os organismos científicos da Comunidade Autónoma de Galicia, en diante a Rede, coa finalidade de fomentar o intercambio e a transferencia de coñecementos entre os organismos científicos, o sector pesqueiro e a administración pesqueira de Galicia.

A Rede configúrase como un órgano colexiado dos previstos na sección 3ª do capítulo I do título I da Lei 16/2010, do 17 de decembro, de organización e funcionamento da Administración Xeral e do Sector Público autonómico de Galicia, e adscríbese á Dirección Xeral de Desenvolvemento Pesqueiro.

Os obxectivos e tarefas do presente convenio foron propostos e aceptados na reunión ordinaria da Rede celebrada o día 30 de setembro de 2025, considerando a realización do proxecto presentado, aliñado coa finalidade da Rede, de interese para os seus participantes e para o sector pesqueiro en particular, así como para o ben común e o interese xeral.

## Segundo

Que a Lei 14/2011, do 1 de xuño, da Ciencia, a Tecnoloxía e a Innovación (“Lei da Ciencia”), no seu artigo 34.1, establece que os axentes públicos do Sistema Español de Ciencia, Tecnoloxía e Innovación, incluídos as universidades públicas, os organismos públicos de investigación da Administración Xeral do Estado, os organismos de investigación doutras administracións públicas e os centros e institucións do Sistema Nacional de Saúde, poderán subscribir convenios suxeitos a dereito administrativo.

Así mesmo, o citado artigo 34.1 prevé que poderán celebrar estes convenios os propios axentes públicos entre si ou con axentes privados que realicen actividades de investigación científica e técnica, nacionais, supranacionais ou estranxeiros, para a realización conxunta das seguintes actividades: a) proxectos e actuacións de investigación científica, desenvolvemento e innovación; b) creación ou financiamento de centros, institutos, consorcios ou unidades de investigación, e infraestruturas científicas; c) financiamento de proxectos científico-técnicos singulares; d) formación do persoal científico e técnico; e) divulgación científica e tecnolóxica; e f) uso compartido de inmoables, de instalacións e de medios materiais para o desenvolvemento de actividades de investigación científica, desenvolvemento e innovación.

Particularmente, as letras a) e c) do artigo citado son aplicables ao presente convenio debido a que o obxecto do mesmo refírese a un proxecto de investigación científica, desenvolvemento e innovación, así como ao seu financiamento.

### Terceiro

Que a Agencia Estatal Consejo Superior de Investigaciones Científicas, M.P. (CSIC), con NIF Q-2818002-D, sede central en Madrid (C.P. 28006) e domicilio institucional en rúa de Serrano núm. 117, de conformidade co artigo 47 da Lei da Ciencia, é un Organismo Público de Investigación (OPI) da Administración Xeral do Estado, actualmente adscrito ao Ministerio de Ciencia, Innovación y Universidades a través da Secretaría General de Investigación, que ten por obxecto o fomento, a coordinación, o desenvolvemento e a difusión da investigación científica e tecnolóxica, de carácter multidisciplinar, co fin de contribuír ao avance do coñecemento e ao desenvolvemento económico, social e cultural, así como á formación de persoal e ao asesoramento a entidades públicas e privadas nestas materias, consonte o establecido no artigo 4 do Estatuto do CSIC, aprobado por Real Decreto 1730/2007, do 21 de decembro (BOE 14/01/2008).

O CSIC está constituído como Axencia Estatal e, na devandita condición, réxese polo establecido nos artigos 108 bis a 108 sexies (introducidos pola Lei de PGE para 2021) da Lei 40/2015, do 1 de outubro, de Réxime Xurídico do Sector Público, e polas disposicións do seu xa citado Estatuto.

En febreiro de 2021 o CSIC obtivo o recoñecemento da Comisión Europea «HR Excellence in Research» (HRS4R) como integrante da Estratexia de Recursos Humanos para Investigadores. Este selo recoñece o compromiso do CSIC co desenvolvemento dunha estratexia de recursos humanos para o persoal investigador aplicando os principios da Carta Europea do Investigador e o Código de Conduta na contratación de investigadores.

Pola súa banda, o Instituto de Investigaciones Marinas de Vigo (IIM) é un instituto propio do CSIC, sen personalidade xurídica diferenciada, enmarcado nas áreas científicas de Recursos Naturais, Ciencias Agrarias e Ciencia e Tecnoloxía de Alimentos. O IIM adícase á ciencia para o desenvolvemento sostible, pretendendo dar resposta aos desafíos globais e ás preocupacións locais relacionadas co medio mariño.

### Cuarto

Que a Consellería do Mar é o órgano da Administración galega ao que lle corresponden as competencias en materia de ordenación e fomento do sector pesqueiro, marisqueiro, acuícola e de transformación de produtos do mar no ámbito de Galicia, de conformidade co establecido no Estatuto de Autonomía de Galicia e segundo os termos sinalados pola Constitución Española, sen prexuízo das competencias que lles poidan corresponder a outros organismos da Comunidade Autónoma de Galicia.

Que de acordo ao establecido no Decreto 149/2024, do 20 de maio, polo que se aproba a estrutura orgánica da Consellería do Mar (que modifica o Decreto 50/2021, do 11 de marzo), corresponde a esta Consellería a investigación mariña e a coordinación, programación e execución de actividades de divulgación e transferencia tecnolóxica nas comunidades pesqueiras e litorais, así como a programación, supervisión, realización e difusión de publicacións e outro material científico e didáctico.

Que o Servizo de Planificación, como órgano de apoio da Subdirección Xeral de Investigación

e Apoio Científico-Técnico, da Dirección Xeral de Desenvolvemento Pesqueiro, ten atribuídas as competencias específicas indicadas no artigo 12.2.4.2 do Decreto 50/2021, do 11 de marzo (modificado polo decreto 149/2024, do 20 de maio), polo que se aproba a estrutura orgánica da Consellería do Mar, entre as que se atopa a xestión de actuacións en materia de estudo, avaliación ou seguimento dos recursos mariños naturais e da actividade pesqueira, marisqueira e da acuicultura.

### Quinto

Que a Xunta de Galicia, a través da Consellería do Mar, así como o CSIC, a través do IIM, desexan establecer unha colaboración para elaborar un plan de manexo espazo-específico para a recuperación das poboacións de zamburiña na ría de Ferrol.

O CSIC levará a cabo as actividades recollidas na proposta presentada e aprobada “avaliación do estado das poboacións de zamburiña (*Mimachlamys varia*) na ría de Ferrol: un enfoque integral para a súa conservación e xestión sostible (ZAMFER)” para alcanzar a finalidade do proxecto.

O 8 de abril de 2022 o Consello da Xunta adoptou o acordo mediante o cal se aprobou a Estratexia de Especialización Intelixente (RIS3) de Galicia 2021-2027, que define o marco para as políticas de investigación e innovación na Comunidade Autónoma para este período. Como instrumento de planificación operativa para a súa implementación entre 2025 e 2027, o Consello da Xunta aprobou o 3 de febreiro de 2025 o Plan galego de investigación e innovación 2025-2027.

O presente convenio alíñase co reto 1 da RIS3 de Galicia 2021-2027, que consiste en desenvolver un modelo de xestión de recursos naturais e culturais baseados na innovación, e coa prioridade 1 (sustentabilidade), en concreto co ámbito de priorización de mellora, preservación, xestión sostible e posta en valor da biodiversidade. Así mesmo, adecúase o obxectivo estratéxico 1 (alcanzar un ecosistema máis aberto e integrado), integrándose, por tanto, no programa Integra da RIS3 e no programa Coñecemento do Plan galego de investigación e innovación 2025-2027.

Ademais, ambas as partes entenden que a súa colaboración promove, dentro do ámbito da actividade pesqueira, un triplo obxectivo de sustentabilidade: ambiental, social e económica, en liña cos Obxectivos de Desenvolvemento Sostible (concretamente o Obxectivo 14), no marco da Axenda 2030 e do Pacto Verde Europeo.

### Sexto

Que para o desenvolvemento das funcións asumidas por cada unha das entidades participantes e xestionar de forma máis eficiente os fondos FEMPA asignados ás mesmas, así como regular as condicións e compromisos que correspondan a cada unha das partes, estas conveñen en formalizar, a tales efectos, o presente convenio que se rexerá polas seguintes

## CLÁUSULAS

### Primeira.- Obxecto

O presente convenio ten por obxecto establecer a colaboración entre a Xunta de Galicia, a través da Consellería do Mar, así como a Agencia Estatal Consejo Superior de Investigaciones Científicas, M.P. (CSIC), a través do Instituto de Investigaciones Marinas (IIM), para a execución do proxecto denominado “avaliación do estado das poboacións de zamburiña (*Mimachlamys varia*) na ría de Ferrol: un enfoque integral para a súa conservación e xestión sostible (ZAMFER)”.

O obxectivo principal do proxecto é elaborar un plan de manexo espazo-específico para a recuperación das poboacións de zamburiña na ría de Ferrol, mediante a caracterización do seu hábitat, o estudo do seu ciclo fenolóxico, a avaliación da captación de semente local e a identificación de substratos preferenciais nos diferentes estadios de crecemento.

Así mesmo, os obxectivos específicos do proxecto son os seguintes:

1. Caracterización espacial do hábitat do banco de zamburiña ao longo da ría, prestando especial atención á composición do substrato, e creación de modelos de hábitat para adultos e xuvenís que permitan delimitar “nurseries” e zonas máis favorables para o sementado.
2. Caracterización do ciclo gonadal das poboacións adultas ao longo dun gradiente lonxitudinal na ría de Ferrol, para comprobar que a estratexia extractiva está en concordancia co ciclo gametogénico actual, que pode desprazarse ao longo dos últimos anos a causa das variacións ambientais consecuencia do cambio global.
3. Caracterización da capacidade de captación de semente como posible suplemento de xuvenís á poboación, empregando colectores artificiais e restos de cunchas, e avaliación da sincronía entre captación e estado gonadal.
4. Estudo dos substratos preferenciais da especie no laboratorio para avaliar a posibilidade dunha restauración dos fondos en zonas con especial potencial para a especie e análise do biso (incluíndo morfometría e funcionalidade) e da súa capacidade de fixación.
5. Elaboración dun plan de manexo espazo-específico que integre a información recollida durante este proxecto e a información da que dispoñen as propias confrarías.

En particular, este convenio regula os compromisos das partes para a execución conxunta das mencionadas actuacións, incluíndo a organización do traballo, a xestión e xustificación da realización dos respectivos compromisos, os dereitos e obrigas das partes, a distribución dos fondos e a titularidade dos resultados, así como a resolución dos posibles conflitos.

### Segunda.- Tarefas a realizar

Para o cumprimento do obxecto do convenio, o CSIC, en coordinación coa Consellería do Mar, comprométese a realizar as seguintes actividades:

Actividade 1: Caracterización espacial do hábitat do banco de zamburiña ao longo da ría de Ferrol e confección de mapas de hábitat para adultos e xuvenís.

Actividade 2: Revisión da fenoloxía da especie respecto ás condicións ambientais actuais.

Actividade 3: Avaliación da capacidade de obtención de semente local de zamburiña para suplementar os bancos naturais en zonas de especial interese.

Actividade 4: Co-creación dun plan de xestión espazo-específico, transferencia e difusión de resultados. Formación de sinerxías co sector pesqueiro.

### Cronograma de execución de las tarefas.

| ANO                 | 2026 |    |    |    |    |    |    |    |    |     |     |     | 2027 |    |    |    |    |    |    |    |    |     |     |     |
|---------------------|------|----|----|----|----|----|----|----|----|-----|-----|-----|------|----|----|----|----|----|----|----|----|-----|-----|-----|
|                     | M1   | M2 | M3 | M4 | M5 | M6 | M7 | M8 | M9 | M10 | M11 | M12 | M1   | M2 | M3 | M4 | M5 | M6 | M7 | M8 | M9 | M10 | M11 | M12 |
| <b>Actividade 1</b> |      |    |    |    |    |    |    |    |    |     |     |     |      |    |    |    |    |    |    |    |    |     |     |     |
| <b>Actividade 2</b> |      |    |    |    |    |    |    |    |    |     |     |     |      |    |    |    |    |    |    |    |    |     |     |     |
| <b>Actividade 3</b> |      |    |    |    |    |    |    |    |    |     |     |     |      |    |    |    |    |    |    |    |    |     |     |     |
| <b>Actividade 4</b> |      |    |    |    |    |    |    |    |    |     |     |     |      |    |    |    |    |    |    |    |    |     |     |     |

A Consellería do Mar realizará as correspondentes actividades de avaliación científico-técnica e económica sobre o grao de cumprimento e adecuación das actuacións do CSIC.

### Terceira.- Entregables indispensables para entender cumpridos os obxectivos deste convenio

O CSIC comprométese a remitir en prazo á Consellería do Mar os seguintes entregables para entender cumprido o obxecto do convenio:

Entregable 1. Cartografía das características físico-químicas e biolóxicas da ría de Ferrol, así como do hábitat preferencial para xuvenís e adultos de zamburiña na ría de Ferrol conforme os modelos construídos no PT1. Esta cartografía irá acompañada dun informe científico-técnico que analizará os modelos de hábitat en relación cos datos ambientais, e as posibles diferenzas entre xuvenís e adultos.

Entregable 2. Informe científico-técnico onde se avalíe o ciclo reprodutivo da zamburiña en relación coas variables ambientais. Este informe presentará tamén unha comparativa do ciclo actual coa información histórica sobre a bioloxía da especie e determinará se existen alteracións fenolóxicas, que poidan facer que o período extractivo actual (mes a mes) estea a interferir no éxito reprodutivo na ría de Ferrol.

Entregable 3. Informe científico-técnico sobre a viabilidade da obtención de semente natural dentro da propia ría, detallando estratexias para optimizar a captación larvaria (substrato preferencial, zonas da ría e períodos), o seu posterior preengorde en batea e a súa integración nos bancos naturais (substrato preferencial para o sementado) para o reforzo das súas poboacións. Doutra banda, faranse recomendacións sobre posibles estratexias de restauración de fondos, para favorecer a expansión dos bancos, establecer “nurseries” e zonas de engorde en función dos substratos preferenciais de cada etapa do crecemento.

Entregable 4. Informe científico-técnico sobre as estratexias de xestión adaptativas resultantes das sinerxías entre o sector pesqueiro e o sector científico.

Entregable 5. Canles de comunicación estables entre sectores, que incluírán un espazo virtual de intercambio de documentación colaborativo (nube) onde estarán a disposición todos os resultados e materiais do proxecto.

Entregable 6. Informe sobre a repercusión social do proxecto, analizando a aceptación dos talleres, charlas ou material divulgativo xerados no paquete de traballo relativo á cuarta actividade das tarefas para realizar recollidas na cláusula segunda.

### **Cuarta.- Compromisos das partes**

As partes comprométense a realizar as seguintes actuacións para o cumprimento do obxecto do convenio:

1. Participar nas actividades colaborativas organizadas no marco do convenio.
2. Entregarse mutuamente, servíndose se fose preciso do mecanismo de seguimento establecido na cláusula sexta, calquera información que sexa necesaria para o correcto desenvolvemento das diferentes actividades, feito, problema ou atraso que poida afectar adversamente ao desenvolvemento do convenio. Así mesmo, as partes proporcionarán, sen demora, toda a información que o mecanismo de seguimento requira razoablemente para levar a cabo as súas tarefas.
3. Garantir a protección dos resultados da investigación e promover a difusión que, no seu caso, proceda, consonte o establecido na cláusula sétima do presente convenio.
4. Cumprir coas obrigacións específicas de información en relación co financiamento por parte da Unión Europea da actividade subvencionada. Segundo o artigo 50 do Regulamento (UE) nº 2021/1060 do Parlamento Europeo e do Consello, do 24 de xuño de 2021, polo que se establecen as disposicións comúns (no relativo ao FEMPA), os perceptores de fondos da Unión farán mención da fonte de financiamento e velarán por darlle visibilidade, en particular:
  - a) Se o beneficiario dispón de web e redes sociais incluírán unha breve descrición da operación, con obxectivos e resultados, destacando a axuda financeira da UE.
  - b) En documentos e materiais de comunicación relacionados coa execución da operación destinados ao público ou participantes, engadir unha declaración que destaque a axuda da UE.
  - c) Placas ou valo publicitario en lugares ben visibles ao público nas que apareza: emblema da UE ao comezo da execución física da operación que implique investimento físico ou se instalen equipos adquiridos, sempre e cando a operación teña un custo total superior a 100.000 €.
  - d) Para operacións non incluídas no apartado c), exhibir nun lugar ben visible para o público un cartel de tamaño mínimo A3 ou unha pantalla electrónica con información sobre a operación destacando a axuda do FEMPA. Cando o beneficiario/a sexa unha persoa física, na medida do posible destacará a axuda do FEMPA nun lugar visible para o público ou mediante unha pantalla electrónica.
5. Someterse ás actuacións de verificación, así como ás actuacións de control financeiro que correspondan á Intervención Xeral da Comunidade Autónoma de Galicia en relación cos fondos aplicados, ás previstas na lexislación do Tribunal de Contas e do Consello de Contas, ás da

autoridade de xestión e, no seu caso, dos servizos financeiros da Comisión Europea e do Tribunal de Contas Europeo, e facilitar tanta información lles sexa requirida no exercicio das actuacións anteriores.

6. Facilitar toda a información que lles sexa requirida pola Intervención Xeral da Comunidade Autónoma de Galicia, polo Tribunal de Contas e polo Consello de Contas ou calquera outra instancia autonómica, estatal ou comunitaria de control, no exercicio das súas respectivas funcións de fiscalización e control do destino dos fondos aplicados, e facilitar a inspección e control dos órganos da Consellería do Mar co fin de supervisar o cumprimento das actividades do convenio.

7. Manter un sistema de contabilidade separado ou un código de contabilidade apropiado que proporcione un rexistro de auditoría adecuado en relación con todos os gastos correspondentes aos investimentos realizados en virtude deste convenio, e conservar a documentación xustificativa relativa ao seu financiamento.

8. Custodiar e conservar a documentación da actividade financiada polo FEMPA, de conformidade co artigo 82 do Regulamento (UE) nº 2021/1060 do Parlamento Europeo e do Consello, do 24 de xuño de 2021, polo que se establecen as disposicións comúns. Neste sentido, deberanse conservar os documentos xustificativos e demais documentación relativa ao financiamento durante un período de cinco anos, a partir do 31 de decembro do ano no que se realizou o último pago.

9. De acordo co Plan Xeral de Prevención de Riscos de Xestión e Medidas Antifraude da Xunta de Galicia, todas as entidades deberán aplicar e esixir medidas antifraude, así como cubrir as oportunas declaracións de ausencia de conflito de interese.

Calquera persoa que teña coñecemento de feitos que poidan constituír fraude ou irregularidade en relación cos proxectos financiados con cargo a fondos da Unión Europea, como é o caso deste convenio, poderán poñelos no coñecemento do Servizo Nacional de Coordinación Antifraude (SNCA) da Intervención Xeral da Administración do Estado, polos medios electrónicos a través da canle habilitada para o efecto polo dito servizo no enderezo web <http://www.igae.pap.minhafp.gob.es/sitios/igae/es-ES/Paginas/denan.aspx>, e nos termos establecidos na Comunicación 1/2017, do 6 de abril, que se pode consultar no enderezo web <http://www.igae.pap.minhafp.gob.es/sitios/igae/es-ES/snca/Documents/ComunicacionSNCA06-04-2017Canaldenuncias.pdf>.

Sen prexuízo disto, tamén poderá utilizar a ligazón de denuncias sobre irregularidades ou condutas fraudulentas que terá a súa sede no Sistema Integrado de Atención ao Cidadán (SIACI): <https://transparencia.xunta.gal/canle-de-denuncias>.

10. Facilitar cantos datos resulten necesarios para a valoración do convenio no marco da avaliación da RIS3 de Galicia 2021-2027 ou doutros mecanismos relacionados coa medición da I+D+i.

## Quinta.- Réxime económico

O importe total das achegas previstas no convenio por parte da Consellería do Mar ao CSIC ascende a un total de 167.653,63 € (cento sesenta e sete mil seiscientos cincuenta e tres euros con sesenta e tres céntimos), distribuídos en dúas anualidades: 84.093,54 € (oitenta e catro mil noventa e tres euros con cincuenta e catro céntimos) no 2026 e 83.560,09 € (oitenta e tres mil cincocentos sesenta euros con nove céntimos) no 2027.

As citadas achegas financiaranse con cargo á aplicación orzamentaria 16.03.723A.640.1 (código de proxecto 2024 - 141) dos Orzamentos Xerais da Comunidade Autónoma de Galicia.

As actuacións recollidas no presente convenio son financiáveis, nun 70%, co Fondo Europeo Marítimo, de Pesca e de Acuicultura (FEMPA). Faise constar tamén a elixibilidade da actuación que se pretende no marco da Prioridade da Unión, Obxectivo e Tipo de Actividade do FEMPA 1.6.3: Impulso da investigación dos recursos mariños e sistemas de gobernanza, prevista no artigo 26 do Regulamento (UE) 2021/1139, do 7 de xullo de 2021. Esta participación farase constar en todas cantas actuacións se realicen ao amparo deste convenio.

O importe que a Consellería do Mar achegará ten como destino exclusivo a compensación dos custos nos que incorre o CSIC, na realización dos traballos e por causa exclusiva do seu desenvolvemento, polo que non existe ánimo de lucro por parte de este último. A achega convida non se fai en concepto de contraprestación, e no convenio non haberá intercambio de prestacións patrimoniais, nin a citada achega poderá ser calificada de prezo, aínda que se faga en diñeiro, senón de compensación de custos.

Os gastos deberán ser realizados, facturados e efectivamente pagos dentro do ámbito temporal do propio convenio e, por tanto, no referido unicamente a actuacións realizadas unha vez xurda efectos o convenio e ata o 20 de decembro de 2027, coas seguintes datas de xustificación para os períodos de realización de gastos e pagos imputables a cada anualidade:

| Data límite de xustificación | Período imputable                                       |
|------------------------------|---|
| 30 de novembro de 2026       | Dende o inicio de vixencia do convenio ata o 30/11/2026 |
| 30 de novembro de 2027       | Dende o 01/12/2026 ata o 30/11/2027                     |

As cantidades indicadas faranse efectivas pola Xunta de Galicia mediante transferencia bancaria en conta aberta a nome do CSIC que este indique e certifique (indicando no concepto da transferencia o acrónimo ou código identificativo que acorden), e previa conformidade do ordenante do pago, con alusión ao cumprimento das actividades recollidas na cláusula segunda.

Esta conformidade realizarase unha vez completadas as actividades obxecto deste convenio e previa presentación á Consellería do Mar da seguinte documentación xustificativa:

1. Memoria de execución das actividades deste convenio, con indicación detallada das actuacións realizadas e dos resultados obtidos, na que deberá incluír unha relación das persoas/entidades que participaron nas mesmas e unha descrición específica das actividades realizadas por cada unha delas. A memoria incluírá a acreditación da publicidade realizada.
2. Memoria económica coa xustificación dos gastos incorridos. A memoria incluírá:

- Unha relación detallada de gastos e pagos realizados.
- Documentación acreditativa dos gastos, consistente en facturas ou documentos de valor probatorio equivalente no tráfico xurídico mercantil ou con eficacia administrativa. Cando o beneficiario non dispoña de facturas electrónicas, deberá anexar unha copia en formato PDF dos documentos orixinais.
- Documentación xustificativa do pago: copia de transferencias bancarias, certificados bancarios ou extractos bancarios, ou documentos obtidos a través de banca electrónica. Nestes documentos deberán estar claramente identificados o receptor e o emisor do pago, o número e a cantidade total da factura pagada.

Na devandita xustificación permítese, en cada anualidade, un transvasamento de fondos entre os conceptos recolleitos na solicitude de ata un 20%.

3. Relación detallada doutros ingresos ou axudas que financiaran a actividade obxecto da transferencia, con indicación da súa contía e orixe (declaración de axudas solicitadas ou outorgadas para o mesmo proxecto ou para as mesmas partidas de gastos, procedentes de calquera administración ou ente público ou privado, nacional ou internacional).

4. Indicación do lugar e do órgano de custodia da documentación acreditativa orixinal.

Sen prexuízo da documentación sinalada nos puntos anteriores, poderá ser requirida a achega de datos, documentos complementarios e aclaracións que sexan necesarios para a tramitación e resolución do procedemento.

En todo caso, a xustificación axustarase ás esixencias da normativa da Unión Europea e nacional relativa ao FEMPA.

Procederase ao reintegro, total ou parcial, dos fondos recibidos e os xuros de demora devindicados dende o momento do pago e ata a data na que se acorde a procedencia do reintegro, en caso de incumprimento das condicións establecidas neste convenio e que imposibilitan a percepción económica compensatoria do traballo realizado.

### **Sexta.- Comisión mixta de seguimento**

Constituirase unha comisión mixta para o seguimento, interpretación e avaliación das accións derivadas do presente convenio, que asegure o bo fin e cumprimento do mesmo.

Por parte da Consellería do Mar, serán membros: a persoa titular da Dirección Xeral de Desenvolvemento Pesqueiro e a persoa titular da xefatura do Servizo de Planificación.

Por parte do CSIC, serán membros: a persoa titular da Dirección do IIM e a persoa responsable da liña de investigación do proxecto.

A asistencia ás reunións que celebre a comisión terá carácter delegable en persoas pertencentes á mesma entidade da que delegue. Así mesmo, poderán asistir ás mesmas, con voz e sen voto, aquelas persoas que sexan requiridas en función da súa experiencia ou profesionalidade e por razón da materia concreta da que se vaia a tratar.

A comisión mixta de seguimento rexerase polo establecido para os órganos colexiados na sección III, capítulo I do título primeiro da Lei 16/2010, do 17 de decembro, de organización e funcionamento da Administración xeral e do sector público autonómico de Galicia.

### **Sétima.- Propiedade dos datos e difusión dos resultados. Uso dos signos distintivos**

A Consellería do Mar e o CSIC manterán confidencialidade sobre calquera información relativa aos resultados das actuacións realizadas ao amparo deste convenio, sempre que non sexan de dominio público, non desvelándoa de ningún xeito sen autorización expresa da outra parte e non utilizándoa para calquera outro propósito que non sexa o expresamente permitido polo presente convenio.

A propiedade e utilización científica dos datos obtidos a partir das experiencias desenvolvidas no proxecto e os resultados finais da investigación serán exercidas conxuntamente pola Consellería do Mar e o CSIC. Unha vez executadas as investigacións descritas no convenio, comprométense a intercambiar o material científico e os coñecementos obtidos, así como a publicar conxuntamente os resultados da investigación obxecto do convenio.

Neste sentido, cando se realice calquera tipo de comunicación ou divulgación dos resultados, xa sexa parcial ou total, farase mención explícita ao feito de que os datos obtidos a partir das experiencias desenvolvidas e os resultados das análises son froito do presente convenio. Ademais, deberán aparecer os signos distintivos das partes nos soportes utilizados para a divulgación dos resultados, tendo en conta que a denominación legal e social das partes, as súas marcas rexistradas, logotipos e calquera signo distintivo son propiedade exclusiva de cada unha delas.

Por iso, o CSIC autoriza á Consellería do Mar para que use o seu nome e/ou logotipo conforme á normativa de imaxe institucional aplicable, sempre que o uso que vaia realizar do mesmo se limite exclusivamente a indicar a relación establecida entre as institucións no presente convenio, polo tempo que esta dure, e non induza a confusión organizativa, comercial ou de aval científico entre aquela parte e o CSIC nin o asocie a obxectivos ou actividades incompatibles cos principios e obxectivos da Administración, e sen que, en ningún caso, se lle confira dereito algún de exclusividade, nin permita a súa apropiación, mediante rexistro ou calquera outro procedemento. Calquera outro tipo de uso ou ante a dúbida razoable sobre a adecuación de uso ao expresado anteriormente, requirirá a autorización previa e expresa, por escrito, do CSIC.

Igualmente, a Consellería do Mar autoriza ao CSIC para o uso do seu nome e/ou logotipo en termos equivalentes aos descritos no parágrafo anterior.

Ademais, as partes comprométense a adoptar as medidas en materia de información indicadas no artigo 60 do Regulamento (EU) nº 2021/1139. En todos os documentos e medidas de información e comunicación recoñecerase o apoio dos fondos FEMPA mediante a inclusión do emblema da Unión, unha referencia ao Fondo Europeo Marítimo, de Pesca e de Acuicultura (FEMPA) que financia a actuación, incluíndo a porcentaxe (70%) e o logotipo da Xunta de Galicia.

Durante a vixencia do convenio informárase do apoio dos fondos FEMPA mediante unha breve descrición da operación no sitio web e colocando un cartel con información sobre as actuacións realizadas (tamaño mínimo A3).

### **Oitava.- Publicacións e propiedade dos resultados**

Nas publicacións das actuacións do convenio deberán respectarse os dereitos dos membros do equipo de investigación, en especial o dereito para ser designados como inventores ou autores.

Cando unha das partes desexe utilizar, en parte ou na súa totalidade, esta información para a súa publicación como artigo, conferencia ou outro formato, deberá solicitar a conformidade á outra parte por escrito que, á súa vez, deberá responder nun prazo máximo de trinta (30) días. Transcorrido este prazo sen obter resposta, considerarase que a parte correspondente autoriza a utilización da devandita información.

As publicacións deberán recoñecer e facer constar a participación de todos os investigadores que interviñeron, así como a súa pertenza ás institucións das cales dependan. En calquera dos casos de difusión, farase sempre especial referencia ao organismo financiador.

No suposto de resultados susceptibles de protección, así como de explotación, as partes, nun prazo máximo de tres (3) meses a partir da súa obtención, comprométese a subscribir un documento no que se determinará a titularidade dos dereitos de propiedade industrial e as condicións da súa explotación.

En calquera caso, ambas as entidades poderán facer uso dos coñecementos adquiridos durante a execución do convenio en actividades propias da súa función investigadora.

### **Novena.- Modificación**

As partes poderán modificar, por acordo mutuo, os termos do presente convenio, debendo quedar reflectido por escrito a través da subscripción dunha addenda dentro do período de vixencia do mesmo.

Así mesmo, de conformidade co previsto no artigo 31.4 da Lei 14/2013, do 26 de decembro, de racionalización do sector público autonómico, os convenios subscribidos pola Administración xeral da Comunidade Autónoma e as entidades instrumentais do sector público autonómico poderán ser obxecto de modificación cando teñan como finalidade o logro dos obxectivos de estabilidade orzamentaria e sustentabilidade financeira. Estas modificacións terán por obxecto a redución do volume das obrigacións ou a ampliación do seu prazo de execución, e terán igualmente que substanciarse mediante a formalización dunha addenda para o efecto entre as partes antes da finalización do convenio.

### **Décima.- Extinción do convenio e consecuencias en caso de incumprimento**

Consonte o previsto no artigo 51.1 da Lei 40/2015, do 1 de outubro, o presente convenio extinguirase polo cumprimento das actuacións que constitúen o seu obxecto ou por incorrer en causa de resolución. Serán causas de resolución:

- O transcurso do prazo de vixencia do convenio sen acordarse a prórroga do mesmo.
- O acordo unánime dos asinantes.
- O incumprimento das obrigacións e compromisos asumidos por parte dalgún dos asinantes.
- A decisión xudicial declaratoria da nulidade do convenio.
- Calquera outra causa distinta das anteriores prevista nas leis.

En caso de incumprimento das obrigacións e compromisos asumidos por parte dalgún dos asinantes, a parte afectada convocará á comisión mixta de seguimento establecida na cláusula sexta para os efectos da adopción das medidas necesarias para o seu cumprimento.

Se tras a actuación da comisión mixta de seguimento persistise o incumprimento, entenderase resolto o convenio por tal motivo e a parte afectada poderá esixir á incumpridora a indemnización por danos e perdas que legalmente lle corresponda.

Cando conorra algunha causa de resolución do convenio, se existen actuacións en curso de execución, poderase acordar, a proposta da comisión mixta de seguimento, a continuación e finalización destas nun prazo improrrogable, transcorrido o cal o convenio deberá liquidarse. Este prazo será fixado polas partes cando se resolva o convenio, de conformidade co previsto no artigo 52.3 da Lei 40/2015, do 1 de outubro, de Réxime Xurídico do Sector Público (LRXSP).

#### **Undécima.- Réxime xurídico e resolución de conflitos**

Este convenio ten carácter administrativo e rexerese polas súas propias cláusulas e polo réxime xurídico en materia de convenios, previsto no capítulo VI do título preliminar da Lei 40/2015, do 1 de outubro, de Réxime Xurídico do Sector Público, coas especialidades previstas no artigo 59 da Real Decreto-lei 36/2020, do 30 de decembro, polo que se aproban medidas urxentes para a modernización da Administración Pública e para a execución do Plan de Recuperación, Transformación e Resiliencia, e demais normas aplicables de dereito administrativo.

As partes acordan que calquera diverxencia, discrepancia ou controversia que puidesen xurdir relativas á interpretación ou execución do presente convenio, que non poida resolverse pola comisión mixta de seguimento indicada na cláusula sexta, poderá ser sometida aos órganos da xurisdición contencioso-administrativa.

#### **Duodécima.- Vixencia**

De conformidade co previsto no art. 48.8 da LRXSP, este convenio perfeccionarase na data da súa sinatura e a súa vixencia comezará a contarse dende a súa inscrición no Rexistro Electrónico estatal de Órganos e Instrumentos de Cooperación do sector público estatal (REOICO), ao que se refire a disposición adicional sétima do devandito texto legal, debendo publicarse a continuación no Boletín Oficial do Estado, e finalizará o 20 de decembro de 2027.

Así mesmo, este convenio será obxecto de publicación segundo o establecido no artigo 15 da Lei 1/2016, do 18 de xaneiro, de transparencia e bo goberno da Administración galega.

### **Décima terceira .- Protección de datos de carácter persoal e garantía dos dereitos dixitais**

As partes asinantes comprométense a tratar os datos de carácter persoal a que, no seu caso, teñan acceso ou sexan obxecto de cesión no marco de aplicación do presente convenio, de conformidade co que dispón o Regulamento (UE) 2016/679 do Parlamento Europeo e do Consello, de 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos (Regulamento xeral de protección de datos), a Lei Orgánica 3/2018, do 5 de decembro, de Protección de Datos Persoais e Garantía dos Dereitos Dixitais, e demais normativa aplicable en materia de protección de datos.

E, en proba de conformidade, as partes subscriben o presente convenio, constando como data do mesmo a correspondente á última firma realizada.

Pola Consellería do Mar da Xunta de Galicia

Marta Villaverde Acuña

Conselleira do Mar

Pola Agencia Estatal Consejo Superior de Investigaciones Científicas, M.P.

Carlos Closa Montero

Vicepresidente de Organización e Relacións Institucionais